

滄浪

蔣吟秋著

趙眠雲題



滄浪集序

一 以收到先後爲次

吾友蔣子吟秋。服務滄浪亭圖書館有年矣。既淵源於家學。復寢饋乎故籍。爲文具有根柢。非浮光掠影者所能望其項背。實吾黨之畏友也。今茲絢同人之請。襄集其數年來所爲筆記小說諸名篇。慎選精華。益加潤色。將刊以問世。而索序於余。嘗一一披讀之。皆少年絢爛之文。非吾蔣子才思學力兼到。烏能有此。僕嘗聞之古之善爲文者。讀書也。游覽也。周旋賢士大夫之間也。三者一不可缺。昔人稱司馬子長周覽四海名山大川。與燕趙間豪俊交游。故其文疏宕有奇氣。我蔣子雖僅坐擁書城。足跡不出里閭。然而滄浪勝地。蘇子美浮屠文暢之所經營。有池臺花木之勝。今縱零落。非復舊觀。而一邱一壑。天然之勝。儼自在。其足以發思古之幽情。而恢擴吾胸次者。以視城市譁譁之地。清濁不相侔矣。矧乎早歲讀書。克承家學。而圖書館又多良師益友。彬彬儒士。相與涵育。

而熏陶之。其能文又奚足怪。僕也日逼喧闐之處。甚囂塵上。不克屏除一切。閉戶自精。其幸不幸爲何如也。序君集。得不令吾惘然若失。慨然興嘆。而不能自釋也哉。丁卯九秋同社弟松陵趙眠雲撰於心漢閣南窗。

序二

滄浪蘇州之美蹟也。雖年來荒蕪弗治。然如浣沙苧蘿不以亂頭粗服損其美。與之望衡對宇者。爲可園。可園滄浪之美侶也。不必作東施效顰。而佳麗天然。無覩於滄浪。余友蔣吟秋。於焉佐理圖書。晨至而昃去。則又滄浪之美客也。吟秋能通古文字。能作小詩。其人溫溫。其言醞醞。與之往還。如登滄浪。如涉可園。依依不忍舍。今吟秋彙刊其美文。名之曰滄浪。殆亦以文字之美。與滄浪之美。深相契也。四月余南歸。曾一與滄浪美術之會。沉檀繚繞。夫詩心。夏木鬱森乎水榭。金革協文雅奏。管弦鳴其和聲。余與吟秋俛而遐思。仰而讚嘆。以爲亂離之後。不圖復見今日。吟秋殆不忘嚮間之因緣而有是刊歟。嗚呼。滄浪其美之魂乎。我其爲巫咸以序我友之美文。同社第吳江范烟橋。

滄
浪
序

二

序三

嗟乎。今之世濁世也。熙往攘來。醉生夢死。芸芸衆生。大抵沉溺其中而不能自拔耳。而乃有人焉。怡神虛白。悅性冲元。恬淡不與世人相爭逐。優遊歲月。以著作自娛。樂夫天命者。非君子人耶。吾友蔣君吟秋。才學淵深。性情高潔。瀟灑風雅。不染時習。昔謝安稱少時在殿庭見王導。便覺清風來襲人。吾於吟秋亦云焉。君任職省立圖書館。即可園舊址。其中花木泉石幽雅可人。而滄浪亭卽在對鄰。公餘之暇。坐茂樹以詠詩。濯清泉以自潔。回想昔賢遺跡。胸襟清靈。故其著述亦朗然如清風明月。無烟火氣者也。茲集其新著付梓。卽以滄浪名。嗟乎。若君者非吾所謂君子人耶。故樂而爲之序。丁卯菊月吳門顧明道序。

滄
浪
序

序四

滄浪。余舊遊地也。爾時與省校諸子。掉鞅文壇。意氣甚壯。暇則坐面水軒。作臨淵之羨。歲月不居。忽忽將三十年。世變滄桑。同學星散。不佞亦垂垂老矣。道經昔日鼓篋之地。輒徘徊而不忍去。蔣君吟秋。服務於圖書之府。與滄浪亭望衡對宇。治事之暇。輒寄與於翰墨。集說苑筆記諸著雜俎爲一卷。展誦一過。其意潔而詞新。濯纓之水。庶可喻之。而回憶余之絃誦滄浪時。碌碌未有所成就。涉筆之際。旣自愧又自歎也。丁卯孟冬。瞻廬序於海上正風校舍。

序五

余幼讀蘇舜欽滄浪亭記。每誦至澄川翠幹。光影會合。心嚮往之。比來吳門作寓公。數數游其地。雖亭苑蕭條。漸就荒蕪。而崇阜廣水。勝蹟依然。其境既僻居城西。尤爲俗跡所罕至。竊謂清幽二字。或足以概之。吾友蔣君吟秋。頃以歷年所爲詩文小說。彙爲一集。卽題曰滄浪。或謂蔣君久服務於可園之圖書館。圖門適對滄浪。竹影波光。映照几席。編校之餘。偶動佳思。輒揮毫從事著述。故蔣君之文與滄浪有不解緣也。雖然此猶其表耳。蔣君秉孤高之性。懷雕龍之才。揚葩振藻。軼羣而絕俗。苟以評滄浪者評之。吾知其必有合也。然則滄浪之與滄浪。實有更深之因緣存焉。質之讀蔣君文者。亦謂然否。程小青識於吳門蘭廬。

滄
浪
序

二

序六

不慧與同社蔣子吟秋訂交垂四五稔。年富學劬。英才碩望。每觀所譔文章。未嘗不自嘆以爲弗如也。鼎革以還。文風頽敝。一二新進。文從字順之未能。妄以矯揉造作爲工。憂時之士。愁焉悚之。挽狂瀾于旣倒。扶大雅之椎輪。斯文未喪。必有英卓主持之者。微蔣子吾誰與歸。吟秋居滄浪亭畔。杜門却掃。琴書自娛。編校之際。出其餘緒以爲文。窮年累月。積其所著。蔚然成巨帙。滄浪行將剞劂問世。索序于不慧。因書數語以歸之。蔣子道德文章。夙爲吾黨眉目。若夫稗官虞初之作。縱盡態極妍。特雕虫小技耳。殊不足爲蔣子重。亦非不慧所以重蔣子者。吟秋明達。當肆吾言。同社弟楊劍花序于晴翠移南牕下。

滄
浪
序

序七

吳門之滄浪亭。勝地也。吾友蔣子吟秋。雋士也。以雋士而處勝地。則其所發之文章。有不高潔秀拔軼凡絕俗者乎。初成一書。名之曰秋星。余既爲之謀剞劂。不脛而走萬里矣。茲又彙其雜著爲滄浪。仍以剞劂謀諸於余。遂由受古主人爲之刊行。從此滄浪得滄浪而益彰。滄浪因滄浪而愈重。余亦樂附驥尾。於附梓之日。爲書數語於此。

閏二月下浣。鄭逸梅。


清 浪 序

秋江帆影



陳劍人攝

秋山履痕



陳子彝攝